



La foto sveglia nostalgia: Igl onn 1972 han ins disfatg il vegl baghetg da bogn al lag la Cauma. Il project da Valerio Olgiati füss staus treis gadas pli pigns.

In na pil lag ed encunter il cussegl

Participaziun da record alla votaziun communal da Flem

DAD AUGUSTIN BEELI

■ **Votaziuns communalas dispiteivlas ha ei adina puspei dau a Flem. La historia dalla casa da scola nova ei liuga e va a fin quest atun. A fin ei era ida ier l'emprema etappa dil project Lag la Cauma. Cun 267 gie encunter 1007 na han ils da Flem decidiu claramain encunter il credit da baghegiar per la nova formaziun dils baghetgs al Lag la Cauma. Secapescha ch'el seigi satisfatg, ei seigi tuttacass buc stau ina decisiun emozionala mo-bein raschuneivla, puntuescha Remo Castrischer. La participaziun da record da 75,1 pertschien muossa la muntada dalla caussa. Ils da Flem han plidau in lungatg clar. 1007 han getg na al credit da 7,5 milliuns, 267 han acceptau quel. Il cussegl communal aveva presentau al pievel quei credit per restructurar e formar da niev il menaschi e stabiliments da bogn al Lag la Cauma.**

Buc pli metter en perfetg il pievel
Il cussegl communal stoppi veser, ch'il

pievel vegli era decider davart il futur dil Lag la Cauma, declara Remo Castrischer viers LQ. Gia paucas minutas suenter che l'administraziun communal ha communicau ier il resultat dalla votaziun dispiteivla, han ins saviu legger quel sin sia pagina d'internet. Sco Remo Castrischer puntuescha, hagian votantas e votants refusau il credit en emprema lingia per motivs finansials. Ina summa da 7,5 milliuns peisi grev, sch'ins considereschi tgei investiziuns che suondien aunc el proxim futur. Era l'estetica, vul gir l'architectura da Valerio Olgiati, hagi buc saviu perschuer la gronda pluralitad.

Ed ussa, co duess il cussegl communal reagir sin quella terrada? «Il cussegl duess buc pli metter en perfetg il pievel. Il meglier füss sch'el dumandass ad uras avon che schar elavurar gronds projects», gi Remo Castrischer, in dils exponents dils adversaris.

Era füssi ei d'engrau sch'il cussegl communal integrassi era certa gliעד ella commissiun che elavurescha la nova proposta.

Dapli che 15 personas ella giuria?

Il president communal Gaudenz Beeli ei secapescha trumpaus dalla decisiun. Buc mo el, igl entir cussegl communal, deploreschi quella, gi el viers LQ. Ins hagi viu a vegnir la terrada, en quei senn seigi el pil mument buc schi trumpaus. Ch'il pievel decidi schi clar, gliez seigi la pli gronda sorpresa. La reproscha zupada da Remo Castrischer, ch'il cussegl communal hagi cumpigliu memia pauca gliעד el project, lai Gaudenz Beeli buc valer. Ina commissiun da 15 habitantas e habitants seigi stada involvada ella giuria dil project. «Pli democratic san ins buc far la caussa», manegia il president communal. Quella commissiun extendida haveva elegiu avon dus onms unanim il project da Valerio Olgiati sco victur d'ina concorrenza d'architects.

Gaudenz Beeli sto acceptar che la pluralitad dils da Flem vesa auter la caussa. Ei fetschi buc prescha, mo ussa stoppien ins discutir en suprastanza co cuntinuar. Quella discussiun succedi en collaboraziun cul fittadin, l'Arena Alva Gastro SA.

■ PUGN DA VESTA

In giomber pils da Flem

DAD AUGUSTIN BEELI

En buc ina vischnaunca sursilvanana marscha actualmeinschi bia sco a Flem. Ei vegn investau biars milliuns en baghetgs publics, surbaghegiadas ed untgidas. La votaziun pil project dil Lag la Cauma ha ussa dau ina frenada a quei progress: La pluralitad ha survegniu freid ils peis. Memia bia innovaziuns en inagada ei apparentamein damemia.

Ils da Flem ein enonuschents lunsch entuorn pervia da lur strategia da giomber: Dus pass anavon, in anavos. D'ina vart vulan ins esser innovativs, da l'autra vart sefida negin dils politichers communalas. Ins sto dar adatg tgei ch'els fan el casti da Flem. Era sch'els adversaris puntueschan la decisiun clara seigi buc drizzata viers personas, han ins breigia da crer quei. Nums sco Gaudenz Beeli, Reto Gurtner, Valerio Olgiati vegnan savens cumbinai cun complots ed intrigas. Senza raschun. Gioga forse la scuidonza ina rolla ellas emozziuns?

Disfidonza ei giustificada. Discussiuns raschuneivlas, constructivas e democraticas ein adina bunas. Sche quella disfidonza els gremis politics dominescha cuntinuadamein vegnan ins buc vinavon. La schlepra ch'els da Flem dattan a lur cussegl communal simbolisescha quella disfidonza. Ils adversaris giavischan ina cumissiun pli democratica. Il pievel duei saver eleger quei che pertucca il futur dil Lag la Cauma. Forsa savess il cussegl communal da Flem crear ina cumissiun cun rodund 1800 commembers. Tgisà sche quei experiment custass nuot?

En scadin cass duess Flem plaunsiu prender a mauns in auter project, numnadamein la revisiun da siu uoppen. Ils da Flem duessen remplazzar sogn Martin cun in animal dall'aua. Cun quei ch'els da Flem han schi bugen lur lag füss ei evident d'eleger il giomber. Egl uoppen havevess quel duas funcziuns: El simbolisescha il Lag la Cauma e dat perdetga dalla strategia politica.

■ UFFECIS CIVILS

Cumins Rueun e Stussavgia era tier Glion

(abc) Dacuort ei il cussegl da cumin dalla Foppa s'entupaus a Sevegin a sia radunanza annuala. Sco quei che la mistrala Rita Holderegger communicchescha, ha il cussegl denter auter tractau ulteriuras damondas d'entrada. Sigl 1. d'avrel 2002 ha il niev uffeci civil dalla Foppa entschiet sia funcziun sco uffeci regional per tuttas vischnauncas dil cumin. Denton ei era il cumin dalla Stussavgia

s'unius a quei consorzi. A Sevegin ha il cussegl da cumin acceptau unanimamein la damonda dil cumin Rueun. Las vischnauncas Andiastr, Sursaisa, Pigniu, Rueun, Siat e Vuorz fan cun quei era part digl uffeci civil regional a Glion. Quella decisiun munta ch'ins sa scaffir ina plazza da lavur supplementara. Peter Gallmann meina igl uffeci civil dalla Foppa.

Biars ein vegni per tedlar Leo Tuor

Presentaziun da sia nova ovra «Onna Maria Tamera» a Sumvitg e prelecziun

■ (anr/gc) Da Sontgilcrest encunter sera ha la sala dall'ustria dalla Staziun a Sumvitg strusch pudiu tschaffar il grond auditori. Mess en marveglias veva la nova ovra da Leo Tuor «Onna Maria Tamera» ni «Ils antenats» e buca meins era il discuors cuagl autur, cumpariu per la vigelgia dalla presentaziun en La Quotidiana. Ch'el ha taxau leu ils lecturs romontschs sco in fetg fideivel, gie schizun sco il meglier publicum dil mund e ch'el aduri veva flattau. Quel ei lu era vegnius en roschas per tedlar igl autur ch'ha mintgamai detg enzatgei cu el ha scret. Ed ins ei nuota vegnius trumpaus, mo-bein confruntaus cun in che scriva tenor Felix Giger ovras en «in lungatg precis e differenziau e ch'ei magari schizun sil fil d'esser ina satira per sesez».

Il 40. cudisch dalla casa editura Octopus

La nova ovra da Leo Tuor ei la 40avla che Octopus – la casa editura d'Andreas Joos e Maria Cadruvi – ha ediu en bie-bein 20 onns. Nr. 25 fuvu dil reminent «Giacumbert Nau» – dil medem scribent. Secapescha ch'els dus responsabels



Leo Tuor delectescha cun preleger.

FOTO G. CAPAUL

dalla editura d'ina retscha da custeivlas ovras romontschas ein stai leds da tons alla presentaziun da lur publicaziun novissima.

Editura e lectorat fuolan via

Dils editurs dependa ei grondamein, schebein in'ovra scretta resta manuscret u daventa cudisch. Aschia introduce-scha Felix Giger, cauredatur dil Dicziunari rumantsch grischun, che ha lectorau la nova ovra. Sias expectoraziuns tangheschan ton la rolla da quel che lectorescha competentamein sco investas tipicas ed interpretaziuns caracteristicas ella e dalla nova ovra. Ein casa editura e lectorat dil medem meini eisi dau glich verda alla publicaziun. Tier l'ovra da Leo Tuor seigi ei stau pauc da spurlar.

Dau in schatg e fatg queidas

Tenor Felix Giger dessegna Leo Tuor cun plaid. El raquenti buca historias dad A-Z, mo-bein eveniments, piculezas, miardas, denton cun in dun marveglius d'observaziun. Aschia s'empluna ina scena sper l'autra, senza ch'ellas seligien e stettien en la successiun dils temps. Tgei far cun regurdientschas? Pli

baul tenevan ins si talas, sco per semeglia las hartas da morts els cudischs da messa. Oz mettien ins quei en ina scatola sco p.ex. en ina tala da brissagas. Simbolisau vegn quei cun la brissaga che paradescha silla cuviarta davontier. Onna Maria Tamera vesa e senta bia. En la gallaria cumparan antenats (il tetel complementar) en grond diember. Eisi bien da dumandar danunder ch'ins vegn u buc? Il cudisch lai nescher damondas e rispostas. Ed ins entaupar oravontut quei ch'ins veseva ed udeva buc – sa pia far scopertas.

Felix Giger ha capiu da metter fil en guila. Leo Tuor ha dau enzacons schatgs ord l'ovra – serius e leghers – che han fatg ressortir ch'igl entruidader veva declarau bein tgei che seigi cuntenu. Igl autur ei era semussaus fetg engrazievels viers quels che han possibilitau ad el da scriver ed edir l'ovra. Tala vegn – tenor Felix Giger – legida «cun gust e senza in soli mument da liunguriala.» Quei ha Leo Tuor era cumprovau cun sias prelecziuns.

PS. Il cudisch «Onna Maria Tamera ni Ils antenats», 192 paginas, prezi: 30 francs, ei da retrer da tuttas stizuns da cudischs e dalla casa editura Octopus a Cuera.